

վանդ սովետական կարգերի հաստատումից հետո գավառի կենցաղի բոլոր ճշուղների մեջ: Նույնիսկ ինտելիգենտ կանայք չեն կարողանում իրենց վիշտը զսպել և իրենց պարտքն են համարում այդ վիշտը ի լուր ամբողջ հավաքված քաղմության բարձրաձայն արտահայտել: Այդ ողբով ապացուցվում էր հանգուցյալին, թե որչափ ամուր են կապված եղել տանեցիք և բարեկամները նրա հետ, և հազիվ թե կարելի է կասկածել, որ դա ետնագույն ձևափոխություն է նախնական դարերի այն սովորություն, որով պահանջվում էր, որ կինն ու ծառաները հետևեն մեռած տղամարդուն դեպի հանդերձյալ աշխարհը և թաղվեն նրա հետ միասին: Դարերի ընթացքում վերացել է նաև տղամարդկանց մասնակցությունն այդ ողբին, որը նկարագրված է Արտաշես արքայի մահվան և հուղարկավորության ավանդության մեջ, որտեղ տղամարդիկ ևս սիրած թագավորի մոտ իրենց վերքեր էին պատճառում, նույնիսկ անձնասպան լինում⁹⁵:

Կանանց ողբի մեջ պահպանվել է մի մանրամասնություն, որտեղ անդբարդաժ է ննջեցյալին զոհվելու վաղեմի սովորությունը: Լավան կանանց գովերգերի մեջ շարունակ կրկնվում է ողբացողի պատրաստակամությունն իրեն մատաղ բերելու ննջեցյալին: Լացուկոծով հագեցրած գովքն անշուշտ նպատակ ունի ննջեցյալին զոհ ճանապարհ դնելու, թվում է, որպեսզի նա այն աշխարհումն էլ խանդաղատանքով հիշի յուրայիններին, միշտ բարի տրամադրված լինի նրանց նկատմամբ և օժանդակի նրանց հաջողություններին: Իրենց մատաղ բերելու պատրաստակամության հետ նաև գովաբանում էին ննջեցյալի արտաքինը—նրա հասակը, ջանք, պայծառ երեսը, քաղցր հայացքը, վարժ ձեռքերը, արագաքայլ ոտները, նրանից բուրոջ հոտը և նրա հրմտությունը որպես երկրագործ, անասնապահ, որսորդ, արհեստավոր, և նրա շնորհքը ժողովրդի մեջ նստել վեր կենալու, խոսելու, դատելու... այս ամենը ծայրահեղ չափազանցություններով:

Տղամարդիկ հետևում էին ննջեցյալին մինչև գերեզմանատուն, որտեղ գերեզմանի փոսը փորած էին լինում ազգական կամ հարևան մարդիկ, հանգուցյալի հետ բարեկամություն արածները: Նաժի վրայից կարպետի միջից դիակը հանում էին և պատանքված վիճակում իջեցնում գերեզման ու հողով ծածկում: Առաջին բուռ հողը ձգում էին ամենամեծավոր ազգականները: Հողաթումբը կնքվում էր քահանայի աղոթքով և թումբի վրա դրած խաչով: Այնուհետև հուղարկավորները մոտենում էին ննջեցյալի տերերին, ձեռքը սեղմելով իրենց ցանկությունն էին հայտնում և մխիթարություն մաղթում: Ապա բոլորն էլ ուղևորվում էին ննջեցյալի տունը ժրմաճաց⁹⁶ ուտելու:

Տուն մտնելիս բոլորն էլ, ինչպես վերն ասացինք, պիտի ձեռները լվանալին, կարծես ցանկանալով մաքրվել այն պղծությունից, որն իրենց էր անցել ննջեցյալից, շնայելով որ նա արդեն մաքրված է եղել նրան լողացնելուց հետո: Կանայք ևս ողբասացությունից և լացուկոծից հետո սեղան նստելիս

⁹⁵ Մովսես Խորենացի, գ. II, գլ. Կ:

⁹⁶ Ժրմաճացը կրկին մի մոգական եղանակ էր. ուտելով՝ կերակրել նաև ննջեցյալին: Ժրմահացը տրվում էր տարներ մեկ անգամ, ամեն ընտանիքում նոր և հին ննջեցյալների հոգու փրկության համար՝ մեռելոցի օրը, նաև օրհնել տալով նրանց գերեզմանները: Թե՛ ժրմաճացին և թե՛ մեռելոցներին չէր կարելի խմիչքի բաժակներն իրար դարկել, անհրաժեշտ էր դրա փոխարեն բաժակը ձեռքին, ձեռքը ձեռքին կպցնել՝ առանց ձայնի: Ժրմաճացը նախնական հասարակությունից որպես վերապրուկ մնացած համայնքային ճաշկերույթների հետքերն են, որոնք կազմակերպվում էին թե՛ թաղման ծեսից հետո և թե՛ որեւէ ուրախ ծեսերի առիթով: